


EUSKAL-ERRIA

REVISTA VASCONGADA

T.^o LXXIX

SAN SEBASTIÁN 15 DE DIDIEMBRE DE 1918

N.^o 1214



LOURDES EN DONOSTIA

LURDES

SUBIRUTAR Bernardeta, neskach zorionekoari Birjiña Maria agertu zitzayon egun gogoangarri ura ezker, Lurdes'en izen atsegiña ezpain guzietan darabillkigu, baña ezpañetan baño geyago oraindik adimenean ta biyotzean.

Gabe'ko ibai ondoko aitzulo pozgarrian dagon irudi zoragarriaren oñetara, ludi'ko baztar guzietatik biltzen dira osteak, Andre Maria'ri agur estitsuak egitera ta otoi šamurrak egiñaz gorputzarentzako osasuna ta arimarentzat zeruko onetsiak biyotzez eskatzera.

Lurdes'ko Ama maiteari agur sutsuak eskeñitzera, ludi guzitik juan badira, euskeldunak ezin atzian geldituko ziran; eta, ala, askotan eta askotan Masabiel'ko aitzulo miragarriaren ondoan bildu izan dira ta gogotsu ta pozkidaz beterik, gure izkuntza zarrean abestu izan dute:

Agur, agur, agur Maria
Agur, agur, guziz garbia.

Lurdes'ko ama Maria'ren ganako lei biziya, etzan an amaitzen, etzan uri atsegin ura uztian galdutzen; geruago ta sutsuago, geruago ta pizkorrago euskeldunen biyotzetan azaltzen zan.

Euskal errira biurtzerakoan, ala uri aundietako eleiz apain ederretan, nola uri kaškarrenetako eleizacho apaletan, euskaldunen biyotzak Lurdes'ko Ama'ren ganako maitetasun gartsua agertzen zuten eta beren aboetatik abesti zoragarria irteten zan, esanaz:

Agur, agur, agur Maria
Agur, agur, guziz garbia

Gogo zintzo au alde guzietara gure artean zabaldu da, ta jauregirik ospetsuenetan, eche aberatz, baserri edo bordetan, Lurdes'ko Ama Maria'ren irudi pozgarria apainketa ederrenekotzat jarria ikusten da.

Donostian bertan, Irudi maitagarri ori gabeko echerik ez dala esan liteke. Ama maitea beaz, eche guzietan daukagu.

Ez ori bakarrik; echeetan Lurdes'ko Andre Maria'ren irudi atsegiña izatea aski ez zan, eta orain Irudi ori, Masabiel'ko aitzuloaren irudi maitagarriarekin daukagu, Lurdes bera Donostian baneukaguke bezela.

Zenbaki onen asierako idantzezkiari begiratu besterik ez dago. ¡Nork esan idantzezki ori Lurdes berekoa ez dala! Ta ez da, Donostikoa baizik. Donostiko Lurdes da ori.

Emen, Antigua deitzen diogun echadi zintzoan, domingotar prantzepak ikastola gain gañeko bat daukate. Arkachon'dik bigaldu zituzten eta Donostira etorri ziran. Kaptier izeneko ikastola zeukaten an; izen berekoa daukate emen.

Eta ikastolaren oñetan egin dute gaur guk azaldu degun Masabiel'ko aitzuloaren iduria, Ama maitearen irudi maitagarria bertan ipiñiaz.

Lurdes'en gaudenian ango Irudi miraritsuak zeruko Ama kupitsua gogoratzen badigu, Antigua'ko Lurdes'en dagon Irudia ikusteakoan, Lurdes'en bertan dagoena gogoratu azitzen digu.

Gogorapen orrek gure gogoa indartzen du, sendotzen eta sututzen du, ta otoi samurrak Andre Maria'ri egiten dizkiogu bere Irudi maitetsuaren aurrian belaunikatzerakoan.

Gure naigabetan, oñaze samin negargarrietan, ¿norabiurtuko ditugu gure begiak, Lurdes'ko Ama mireritsuaren gana ez bada? Ta, Ama kupitsu onen Irudi maitekorra echean, Donostian bertan daukagula, ez dago esan biarrik nora itzuliko diran gure begiak, nora juango geran atsegin billa.

Orrengatik ainbeste otoi iñil, samur, biguin, Antigua'ko aitzulo atsegiñean entzuten da, zeruko Ama Maria'ri eskaerak egitera batzuetan, eskerrak ematera beste askotan.

Aitzulo orretatik gure Ama atsegiñak Donostiko urira, esker ugari neurrigabeak iñuri ditzala; gaitz guztitik baztertuaz, gure uria onetsi dezala; ta gure uriarekin batian, Euskal erri guzia onetsi dezala zorionekoa garai guzietan izan dedin.

M. UGALDE